

El Sindicatu d'Enseñanza de Comisiones Obreres d'Asturies considera qu'el nuevu currículu d'Infantil desprecia a la llingua asturiana.

El borrador de currículu d'Infantil presentáu nel mes de xineru pola Consejería d'Educación defrauda les esperances d'una normalización de la enseñanza del asturianu nesta etapa. Hasta'l momentu la escolarización faciáse en forma análoga a la de Primaria nos centros en que esistía tal voluntá y disponibilidad de profesoráu. La propia Consejería, nos datos de matriculación, incorporaba a esti alumnau. Asina sabemos que casi un 10% de los neños y neñes de los centros públicos reciben enseñanza d'asturianu.

El currículu plantea como oxetivu del área "*Conocimiento del entorno*" el "*Descubrir y participar en alguna de las manifestaciones culturales y artísticas del Principado de Asturias*". En concretu, esi descubrir y participar refiérese al himnu, la bandera, canciós, bailles y fiestes tradicionales. Nestes manifestaciones culturales nun se fae una mención expresa a la llingua asturiana. Por exemplu, los amagüestos podríen llamase Fiesta del Otoño o Fiesta de la Castaña y del cancioneru tradicional asturianu podríen selecionase únicamente les cantaes en castellanu, nada nel testu lo impide.

La llingua asturiana ta, teóricamente, dientro del Área "*Lenguajes: Comunicación y representación*", pero esta incorporación llimítase a una escueta mención na introducción: "*La lengua asturiana, como elemento de la cultura, recibirá un tratamiento globalizado desarrollando actitudes positivas hacia el conocimiento de elementos básicos de comunicación*". Al desenvolver la estructura d'esta área la llingua asturiana namás apaez nel l'últimu conteníu del Bloque "*Lenguaje Verbal*".

"Respeto hacia otras lenguas, y también hacia la asturiana, sus hablantes y culturas y disfrute con la convivencia en un mundo plurilingüístico y cultural".

Esto ye insultante: respetu hacia otres llingües... **¡y tamién hacia la asturiana!** ¿Qué ye esto? Si ye llingua, nun fai falta dicilo. ¿Por qué esti amestamientu entrecomes? ¿Tal vez pa que nun podamos decir que nun hai ún solu conteníu rellacionau col asturianu en tol currículu? Asina ye fuera d'esta broma de mal gustu.

Hai que facer equí acordanza, una vegada más, de la Llei d'usu, probablemente la Llei de mayor incumplimientu por parte'l gobiernu rexonal y que nel so artículu 10 diz lo siguiente: *En el ejercicio de sus competencias, el Principado de Asturias garantizará la enseñanza del bable/asturiano en todos los niveles y grados, respetando no obstante la voluntariedad de su aprendizaje. En todo caso, el bable/asturiano deberá ser impartido dentro del horario escolar y será considerado como materia integrante del currículo.* Nun faen falta munchos comentarios, ye bien simple, el borrador del currículu niega esi derechu.

El currículu n'esta redación pasa por altu les distintes situaciones comunicatives que puenalcontrase nel entamu la escolarización: alumnáu cuya llingua materna ye la llingua escolar y alumnáu que se escolariza n'una llingua que-y plantea conflictos colo que siente nel so entornu: la llingua asturiana o l'amestao d'ésta cola castellana. Tener en cuenta esto ye fundamental, los neños y neñes tienen que dir tomando conciencia de les distintes formes de comunicación como una realidá propia o cercana.

Dende'l Sindicatu d'Enseñanza de CC OO presentaremos enmiendes al testu nel procesu d'aportaciones y daremos oportunidá a la Consejería de rectificar esti grave error. De nun ser asina, tendremos que acudir a la xusticia por vulneración de derechos reconocíos llegalmente.

- **Incorporación de la llingua y la cultura asturiana nel currículu la etapa d'Infantil**
- **Eliminación de les ratio mínimes en tolos niveles pa la constitución de grupos de llingua asturiana**
- **Creación de la especialidá de Llingua Asturiana nos Cuerpos de Maestros y Profesores d'Enseñanza Secundaria.**
- **Negociación en Mesa Sectorial de Llingua Asturiana**